
ФАРҶОНА МЕВА-САБЗАВОТЛАРИ ЖАҲОН БОЗОРИДА ХАРИДОРГИР

Жаннатмонанд диёримизда етиштириладиган мева-сабзавотлар жаҳон бозорида жуда харидоргир. Соҳада яратилган қулай тадбиркорлик муҳити, маҳсулот етиштириш, сақлаш, қадоқлаш ҳамда қайта ишлаш жараёнида замонавий технологиялардан самарали фойдаланилаётгани экспорт салоҳиятини янада юксалтириш имконини бермоқда.

Фарғона шаҳрида фаолият бошлаган “ILYASOV” масъулияти чекланган жамиятида Россия ва яқин истиқболда Европа, дунёнинг бошқа қитъаларига экспортни амалга ошириш режалаштирилган.

Корхонада саралаш, қадоқлаш технологиялари ўрнатилиб, музлатгичли омборхоналар барпо этилди. Гилосни қайта ишлаш ускуналарида фойдаланишда инсон омили иштирок этмайди. Фақат саралаш линияларида қўл меҳнати зарур.

– Тадбиркорларга ўз маҳсулотини Россиянинг “Магнит”, “Ярче” каби савдо дўконлари тармоғига тўғридан-тўғри сотишга ҳам кўмаклашамиз, — дейди корхона раҳбари Фахриддин Илясов. – Бизнинг экспорт бозоримиз орқали савдо тармоқларига видео кузатув тизими ёрдамида онлайн ва бирламчи юк топшириш имконияти ҳам яратилган.

Айни пайтда корхона қошида божхона, карантин назорати, мева-сабзавот бозори, фитосанитария лабораторияси, масофадан кузатиш тизими ҳамда савдо майдончаси фаолият кўрсатмоқда.

Корхонанинг очилиш маросимида вилоят сектор раҳбарлари ва экспорт фаолиятини амалга оширувчи тадбиркорлар иштирок этди.

Бизни ижтимоий тармоқларда кузатинг [Facebook](#),
2021-05-06 15:33:33